

## DOMENIE X «VIE PAL AN»

### Antifone di jentrade Sal 26,1-2

**I**l Signôr al è la mê lûs e la mê salvece,  
di cui varaio teme?  
Il Signôr al è chel che al pare la mê vite,  
di cui varaio pôre?  
Ve che si inçopedin e a colin  
i miei nemîs e i miei contraris.

### Colete

Diu, che di te a vegnin dutis lis robis buinis,  
ti prein di dânus l'ispirazion di pensâ ce che al è just  
e la fuarce di metilu in vore.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE 1 Re 17,17-24

To fi al vîf.

Dal prin libri dai Rês

In chei dîs, al capità che il fi [de vedue di Zarepte] si inmalà e si inmalà tant malamentri che al spirà. Alore jê i disè a Elie: «Ce dafâs aio jo cun te, om di Diu? Sicheduncje tu sês vignût culi di me dome par memoreâmi i miei pecjâts e par fâmi murî gno fi!». I rispuindè: «Dami ca to fi!». Jal cjolè dal grim, lu puartà sù te cjamare adalt là che al stave e lu distirà sul so jet. Daspò al preà il Signôr e i disè: «Signôr, gno Diu, i vuelistu propit tant mâl a di cheste femine che mi dà sotet, che tu i fasis murî ancje so fi?». Si distirà trê voltis parsore dal canai e al clamà il Signôr: «Signôr, gno Diu, ti prei: che l'anime di chest frut e torni tal so cuarp!». Il Signôr al scoltà il berli di Elie, l'anime dal frut e tornà in lui e al dè di ca. Elie lu cjapà, de cjamare adalt lu puartà in cjase e jal tornà a sô mari. Dissal Elie: «Ve, to fi al vîf». La femine i rispuindè: «Cumò o sai che tu sês propit un om di Diu e che la peraule dal Signôr su la tô bocje e je veretât!». Peraule di Diu.

### SALM RESPONSORIÂL dal Salm 29

**R.** Ti laudi, Signôr, parcè che tu mi âs liberât.

O ài berlât viers di te, Signôr, gno Diu, e tu mi âs vuarît.  
Signôr, tu âs fate tornâ sù des inferis la mê anime,  
tu âs tornât a dâmi la vite  
e no tu mi âs bandonât cun chei che a van te buse. **R.**

Cjantait al Signôr, vualtris che i sês fedêi;  
al so non sant disêt graciis,  
parcè che dome un lamp e dure la sô fumate  
e il so boncûr par dute une vite.  
Se sore sere si à il cûr che al vai,  
a buinore si scriule di gjonde. **R.**

Vê dûl di me, Signôr, e scoltimi;  
Signôr, dami tu jutori.  
Alore tu âs mudât il gno corot in gjonde.  
Signôr, Diu gno, ti laudarei par simpri. **R.**

## SECONDE LETURE Ga 1,11-19

I à parût di palesâ so Fi in me, par che jo lu predicjâs ai paians.

De letare di san Pauli apuestul ai Galazians

Us fâs savê, fradis, che il vanzeli che o ài predicjât jo nol è robe di oms: di fat jo no lu ài vût di un om e nancje no soi stât inscuelât di un om, ma di Jesù Crist, midiant di une rivelazion. O vês sintût di sigûr di cemût che mi soi compuartât par vieri tal judaisim; o perseguitavi fûr di misure la Glesie di Diu e o cirivi di svinidrive, e o jeri rivât, tal judaisim, plui indenant di ducj chei de mê etât e de mê gjernazie, cjalt come che o jeri, ben plui di lôr, tal difindi lis tradizions dai miei vons. Ma cuant che a di chel che mi veve metût di bande ancjemò dal grim di mê mari e mi veve clamât in virtût de sô grazie i à parût di palesâ so Fi in me, par che jo lu predicjâs ai paians, dal moment, cence interpelâ nissun om, cence lâ a Jerusalem di chei che a jerin stâts metûts apuestui prin di me, mi soi slontanât de bande de Arabie e po o soi tornât indaûr a Damasc.

Plui in ca, dopo trê agns, o soi lâs sù a Jerusalem par interpelâ Chefa, e mi soi fermât li di lui par cuindis dîs. Dai apuestui no ài viodût nissun, però o ài viodût Jacum, fradi dal Signôr.

Peraule di Diu.

## CJANT AL VANZELI Zn 11,25.26

R. Aleluia, aleluia.

Jo o soi la resurezion e la vite, al dîs il Signôr,  
chel che al crôt in me nol murirà par mai.

R. Aleluia.

## VANZELI Lc 7,11-17

Fantaçut, tal dîs jo: jeve sù.

Dal vanzeli seont Luche

In chês volte, Jesù al lè intune citât di non Nain. Lu compagnavin i siei dissepui insiem a un disordin di int. Cuant che al rivà dongje de puarte de citât, si intivà intun muart che al vignive puartât tal sepulcri: al jere l'unic fi di une mari vedue. E une vore di int de citât e jere cun jê. A pene che le viodè, il Signôr al sintì compassion di jê e i disè: «No sta vaî». Po si svicinà a la casse, le tocjà, intant che chei che le puartavin si jerin fermâts. Alore al disè: «Fantaçut, tal dîs jo: jeve sù». Il muart al jevà in senton e al tacà a fevelâ. E lui jal consegnà a sô mari. Alore a restarin ducj scaturîts e a laudavin Diu disint: «Un grant profete al è comparît framieç di nô: Diu al è vignût a viodi dal so popul». La gnove di chescj fats si sparniçà par dute la Judee e par dute la regjon.

Peraule dal Signôr.

## Su lis ufiertis

Cjale di bon voli, Signôr, il servizi de nestre suditançe  
par che ce che ti ufrin al sedi par te un regâl che ti plasi  
e al fasi cressi il nestri amôr.

Par Crist nestri Signôr.

## Antifone a la comunion Sal 17,3

Il Signôr al è la mê crete e la mê fuartece:  
al è lui il gno Diu, che mi libere e mi jude.

## Daspò de comunion

La fuarce de tô midisine, Signôr,  
che nus delibere des nestris tristeriis  
e nus compagni pe strade de justizie.

Par Crist nestri Signôr.